

Ni ez nauzu

Pello OTXOTEN

Ni ez nauzu "muin betirakoa"
ez baitut uste "dana emon biar yakonik"
ez inori edo ez ezerl,
ezta "matte dan azkatasunari" ere;
akaso,

norbaitengatik,
bizia eman edo trukatu ahal izango nuke.

Baina,
ni ez nauzu "muin betirakoa",
ezta izan nahi ere!

Edonon,
gizakiaren odolak kolore bera du,
gorria eta beltza,
lehortu aurretik edo lehortu ondoren.

Nonahi,
haurren aurpegi zoliak,
berdin lehertzen dira,
hemen eta han,
eztanda izan aurretik edo eztanda ondoren.

Ni ez noa gora,
abesti eta ikurrinez;
nahiago dut behera begiratu
eta gogoeta egin,
begiak itxi, irribarre pausakorra ipini,
eta apaltasunean hausnartu.

Nik ez dut oihukatuko
eta sutan garrasi egingo,
nahiago dut larritasunean
izerditu eta gogor lan egin,
geroa ez baita bihar,
ezta etzi ere,
etzidamuren hurrengoa baizik.

Eta lorearen bizitasun sutsua,
bihar edo etzi ustelduko da;
baina haziernalduaren fruitua
eta bere geroa
datorren bedatsean argituko du
dirdai sendoetan!

Zeren,
iraultzaileen hitzez betetzen baitira
hilkutxetako hilotzak.
Eta inongo
eta inoren kemenak ez digu berreskuratuko
arnegaturik galdutako urteak,
ezta suaren beroak ahantziriko
bihotzaren epeltasun barea ere.

Ni ez nauzu "muin betirakoa"
 ez baitut uste "dana emon biar yakonik"
 ez ezeri eta ez inori,
 ez,
 ni neu bainaiz dena
 eta askatasunaren maite kuttuna.
 Eta honi ez diot amore emango
 ez inoren aurrean kontrakoari men egingo.
 Beharbada,
 bihotza galdua daukat dagoeneko,
 baina jakina,
 ni ez nauzu "muin betirakoa",
 ezta izan nahi ere!

JOSEBA K...REN KALUMNIA

Segur aski Joseba K... kalumniatua izan zen,
 izan ere,
 ezer txarrik egin gabe
 goiz batean atxilotu baitzuten.

Itaunketa ahalik eta ongien jasan zuen,
 izan ere,
 galdetzen zitenez ez baitzuen ezer ulertzen.

Hurrengo pausua: Joseba K... odoletan konortea galtzeraino
 gogor jipoitu zuten,
 izan ere,
 preso arriskutsuek egia ondo isiltzen baitakite.

K...ren kasuan frogak oso ahulak ziren —ez zeuden—
 baina zalantza dela medio kartzelan sartu zuten,
 izan ere,
 hobe baita pertsona arriskutsua burdinsarepean gordetzea.

Hurrengo egunetan K... erabat harrিতuta zegoen,
ez zuen ezertxo ere ulertzen,
izan ere,
pairatzen zuen egoeraren kausarik ezin baitzuen inon ere aurkitu.

Bere ama eta arrebak bisitatzera joan zitzaizkiola entzun zuen,
baina beraien aurpegirik ez zuen ikusi,
izan ere,
Estatuko segurtasun neurriek hala gomendatzen baitzuten.

Hamaika urte pasa dira K...rentzat, eta bere herrian
benetan errudun dela pentsatzen dute,
izan ere,
Estatuaren Botereak hala sinestarazi baitu denboraren poderioz.

Kartzelan txakur baten gisara hiltzeaz ere,
bihotzean bi labankadaz, ikara pasa zuen,
izan ere,
beste presoek ez baitzuten begi onez ikusten.

Dagoeneko K...ren osasuna gainbehera doa,
hepatitis B eta bronkitis kronikoa dauzka, baina medikuak ez du ikusi,
izan ere,
kartzelako medikuak 2-3 urtetarako agenda beteta baitauka.

Baina gobernu justu eta demokratiko bati esker,
kartzelan sartu zuen berbera, kalera irten da,
izan ere,
zenbait presoekin magnanimoa izan behar baita herriaren begietan.

Eta orain, Joseba K...k, arimaren kateak apurtzen dirau,
izan ere,
sekulan ez baita libratzen preso egon denaren gogoia.

GEURE HERRIAN ALDIZ ...

Palmondoen hostoek
 haizea margotzen dute,
 eta haize honek antipodetako urak
 kolore deigarriez hornitzen ditu.
 Honela, palmondoen azpian
 neskatala liluragarriak aurkitu ohi ditugu.
 Geurean aldiz, haizeak ez du kolorerik,
 horregatik Gauguin-ek ez zituen
 gure neskatak bere koadroetan pintatu.

Maitasunaren islarik garbiena
 amaren irribarre eta laztan xamurrean dager.
 Sentimendu hau munduko txoko eta zirrikitu guztietan,
 aldaera ezberdinez bada ere, modu orokorrean azaltzen da.
 Bizitzaren emaile, gozamenaren igorle, afektuaren erakusle,
 eskuzabaltasunaren adierazle gorena, berau, ama.
 Geurean aldiz, amen xamurtasuna gogortua dago,
 izan ere, hainbeste sufritu dute urteetan zehar
 ezin baitute jada negarrik egin.

Hegoaldeko eguzki beroek lur joriak jantzi
 eta ekaitz bortitzez busti egiten dira.
 Honela, soin malatsaren fruituak
 oparotasunez bistaratzen dira ororentzat.
 Lur horietan uda izaten da garairik lanpetuena
 eta giroaren beroari lanaren gogorra gehitu behar.
 Geurean aldiz, odol asko ixuri da etengabe,
 horregatik odolkiak neguan egiten dira,
 neguaren isiltasun lokarti eta minberatuan.